





# Kommer oor 'aftrede-apatie' Al meer betaal skuld met pensioengeld

Deur **Gerrit van Rooyen** | Vrydag 29 Mei 2015 08:30


## Wat sê afgetredenes?




**39%**  
Is spyt oor die spaar- en beleggingskeuses wat hulle gemaak het.



**45%**  
Besef nie watter impak die bewaring van spaargeld het nie.



**49%**  
Verstaan nie die belastinggevolge van aftrede nie.



**43%**  
van pensioenarisse dink hulle het genoeg geld vir die res van hul lewe.

Bron: Sanlam Benchmark-simposium 2015

Grafika24

Leer uit die foute van ander afgetredenes...

Suid-Afrikaners is kommerwekkend apaties oor hul aftreebeplanning en al hoe meer mense gebruik hul pensioengeld om skuld te betaal wanneer hulle van werk verander of afgelê word.

Net een uit elke vier Suid-Afrikaners sal hul leefstyl kan handhaaf wanneer hulle aftree.

Dit is van die hoofbevindinge van die 2015 Sanlam Benchmark-peiling, wat Donderdag bekend gemaak is.

Dié peiling (nou in sy 34ste jaar), is 'n omvattende jaarlikse hersiening van die Suid-Afrikaanse aftreebedryf. Meer as 1 000 lede van aftreefondse, trustees en werkgewers is hiervoor ondervra.

Volgens die peiling het die persentasie pensioentrekkers wat as werkendes geld uit hul aftreefondse onttrek het as hulle bedank het of afgelê is, van 21% in 2014 tot 25% in 2015 toegeneem. 57% van pensioentrekkers wat vroeg geld uit aftreefondse onttrek het, het dit gedoen om skuld te betaal en 43% van pensioentrekkers het stéeds skuld om te betaal terwyl hulle afgetree is.

“Om geld uit jou aftreespaargeld te onttrek, is soos om 'n lening by jou toekomstige self te maak, teen 'n baie hoë rentekoers en met geen voorneme om jouself ooit terug te betaal nie,” sê Mayuri Reddy, bemarkingshoof van Sanlam-werknemersvoordele.

Boonop moet 66% van pensioentrekkers steeds 'n kind of kleinkind finansiële ondersteun.

“ OM GELD UIT JOU AFTREESPAARGELD TE ONTTREK, IS SOOS OM 'N LENING BY JOU TOEKOMSTIGE SELF TE MAAK, TEEN 'N BAIE HOË RENTEKOERS EN MET GEEN VOORNEME OM JOUSELF OOIT TERUG TE BETAAL NIE. ”

- Mayuri Reddy van Sanlam

Lees ook:

- Beleggings vir beginners: 10 riglyne vir spaarsukses
- Geldkliniek: Belastingvrye spaar of uittree-annuïteit?
- Kies 1ste wiewe met sorg

“Ons moet begin om meer selfgedisiplineerd met ons finansies te wees ten einde 'n selfstandige en genotvolle aftrede te hê,” sê Reddy.

Hy sê mense moet baie vroeër begin spaar en vroeër beplan vir aftrede as hulle hoop om hul lewenstyl te handhaaf wanneer hulle aftree.

Volgens hom is mense se apatie rakende hul aftreespaargeld baie kommerwekkend. “Die opname wys dat baie mense nie die belastinggevolge of die gevolge van die nie-bewaring van hul aftreegeld verstaan nie.”

Die gemiddelde pensioentrekker kry eers finansiële raad oor aftrede 10,5 jaar voor aftrede.

Net 2 uit elke 10 pensioenfondsleder weet wat hul pensioenfonds se teikens is, hoewel 60% van pensioenfondse sulke teikens het.

36% van pensioenfondsleder het geen ander spaargeld benewens hul aftreespaargeld nie.